

# Filipenses

---

**1** <sup>1</sup>Natyo Paulo, Timóteo, Jesus Cristo wakaneharenae, waxikaty  
exe baberane Enore koamaniya tyaoniterenae, exahe Jesus Cristo  
koamaniya tyaoniterenae wenakalati Filipos yerenae ana. Exahe  
ekaxaikotyaseharenaeha, ekahinaetyaseharenaeha xoaha anere tehitiya  
exe baberane. <sup>2</sup>Maika Wexe Enore, Wiyekohase Jesus Cristo xoaha  
kaxaiko xiso, mehexaikohaliti xoaha isa xomana.

**Paulo Niraexala**

<sup>3</sup>Nihalahareta Enore kakoa notyaxemahenere xiso nihatyaka.  
<sup>4</sup>Tyotyaki niraexahena xitahi hoka niraexaita nihalahalini kakoa. <sup>5</sup>Hetati  
noxakahakenere Iraiti Waiyexe xowakata xakahinaetya natyo kalikini  
kijiya. Hatyo hiyeta nihalahareta xikakoa. <sup>6</sup>Enore atyo koxaka hakita  
xinekon hoka nikare ite heko haka xinekon Jesus Cristo tyoaneneheta  
kijiya. Hatyoharenae waiyekehalakita nomani.

<sup>7</sup>Heko atyo notyaxemata minita xiso, ehekoreta atyo notyaxemaita  
xiso. Hiyaiya, xakahinaetita atyo natyo exe hateniti Enore isehenere  
nomani hiye. Nikare atyo kalikini berexoako notyaonita hoka  
xakahinaetita natyo, exahe nomaberexotyakiharetatere xowaka  
xakahinaetya natyo, nakahawaonitaretya exahe niyatere kakoa noxakai  
maheta Iraiti Waiyexe. <sup>8</sup>Enore atyo waiyoreta nawaiyetitire kalore xiso  
kakoa. Jesus Cristo atyo nikare axomokanikija natyo.

<sup>9</sup>Niraexaita xomana, xiyawaiyetyakakoane exahehare tyaona maheta.  
Exahe masakare waiyekehalaka iraiti xomana maheta, exahe xawaiyore  
maheta <sup>10</sup>hoka waiyexe taita xaoka xomana maheta, hoka xifirahaliya  
xisaona, exahe ximahaiharenahare xisaona maheta Cristo tyohetehenere  
ferakene. <sup>11</sup>Exahe kahareya xoalini hare waiyexe xisoma maheta. Jesus  
Cristo taitaiya atyo nikare moka xiso. Enore kakoa kaihalaharetyaka,  
kamaxalotyaka maheta.

**Nomani Atyo Wenati Cristo**

<sup>12</sup>Nohinaeharenae, kasani nawenani waiyekehalaka xomana naokita. Tyotya  
xoalini hare kaotyakiterenae nomani hiyeta kahare haliti Iraiti Waiyexe sema.

<sup>13</sup>Hatyeta atyo sorarenai, kalorexe hana kaxaikotyasanae ana, exahe haiyanae ana hoka waiyekehala Jesus Cristo wakanehare notyaonitere hiyeta berexoako notyaonitere tahi. <sup>14</sup>Exahe kahare wihinaeharenae waiya nawenani berexoako hoka tyakekoha kaisere Xekohaseti hoka haihalahareneha, hamamairanehareneha kakoa Iraiti Waiyexe xakaitaha.

<sup>15</sup>Aliterexe atyo haiyaharenae xakaihakatyahitaha Cristo tahi akiti, xakore hoka okoawaharahitaha, kirawanahitaha atyo natyo. Hoka haiyaharenae atyo waiye ahekotyahitaha notahi hoka haihalaharene kakoa xakaihakatyahitaha. <sup>16</sup>Hatyonai atyo awaiyetyahitaha natyo hoka nikare tyonaahitaha. Waiyekehala kita atyo enomanaha Enore isehenere hateniti nomani, nakahawaonitaretya maheta Iraiti Waiyexe. <sup>17</sup>Hoka haiyaharenae atyo Cristo tahi xakaihakatyahitaha xakore hoka maisa atyo waiye ahekotyareha. Motyaiyala exahelohala hiye hoka exakaihakalahihiyeta exahetare iniyalahare nokaxomokaki berexoako nali aokahitaha.

<sup>18</sup>Nikare xakore atyo iraetaha hoka enenaharenae atyo. Cristo tahi atyo kaxakaihakatyakita waiyexe xahekore, exahe iniyalahare xahekore xoaha hiyeta hoka hatyohare atyo ehekoreta kaiserehare. Hatyeta nihalahareta hoka exakere ite heko nihalahare notyaona. <sup>19</sup>Xiraexala, exahe Jesus Cristo Nisekohare kahinaera natyo hiyeta ite nahikoaheta berexoakota. Hatyohare atyo waiyekehala kita nomani.

<sup>20</sup>Exakere atyo notyoma naokowita: kasani maisa xoare hare mametyakahareta nahalakisa nohateni naokowiye. Nikare ite heko nihalahare kalikini, nomamairanihare ite notyaona. Nikare ite Cristo naeroretya nawenani kakoa exahe nokamani xoaha kakoa. <sup>21</sup>Hoka xoare hare ala wenati? Nomani atyo Cristo xema nawenatyaka, hoka kawainisakiterehare atyo waiyexe ana kakaokatyakiterehare. <sup>22</sup>Hekotaiya nokaseta hoka hateniti waiyexeya notyomehitiya. Maisa waiyekehala kere nomani xoare kaisere xamani ite naohenia nomani. <sup>23</sup>Hinama maniya nokatalatyakita. Kasani nahalakisa aliye wenati hoka Cristo nali noxani hoka waiye kaiserehare notyaona naokowita. <sup>24</sup>Xakore hoka masakare atyo xiwaiyakahare heko nokaseta notyaona naokowita.

<sup>25</sup>Nawaiyore hatyohare kakoa hoka hekota ite notyonehitiya xikakoa. Heko ite notyaona xikakoa, nakahinaetya xiso hoka xikekoare exahe xihalahare xoaha. <sup>26</sup>Nikare ite nokaokihitiya xomana hoka nowaiyehitiya xiso hoka xihalahare ite nokakoi, Jesus Cristo kakoa hahotalita xisaonitere hiyeta.

<sup>27</sup>Cristo aokitere akereta xisaona hoka hatyeta atyo waiye kaiserehare. Nikareya xisaonita hoka notyoa xamani, maisa xamani nowaiyehitiya xiso hoka waiyekehala nomani heko xikinatere xisaonitere Iraiti Waiyexe xema. Waiyekehala tehtiya ite nomani haxawalita xaiyateretyoitere xityakekone kakoa Iraiti Waiyexe aokitere akereta. <sup>28</sup>Awaira atyo ximairehena xahalakoaharenae. Maika xikinatere xisaona. Nikareya xisaona hoka xaimenekoita atyo enomanaha ijijyahaotyakaha exahe xijijyahaolahene. Hiyaia, Enore atyo kahinaetita xiso xijijyahaotyakaha maheta.

<sup>29</sup>Enore atyo aeroretita xiso Cristo wakanehare xisaona maheta. Exahe maisa xityakekotene taita maheta xini, iniyalahare tehitiya xikaxomokaka ihiyeta maheta. <sup>30</sup>Kalikini ite noximi xisaona nawenani akereta hoka waiyateretyoa. Nikare kafaka maniya noxaiyateretyoani xiayiya, exahe kalikini hoka hekota naiyateretyoita. Exe harenae waiyekhalakita xomana.

### Cristo Maxaokowiharetyoanene Exahe Exairoretyaka

**2** <sup>1</sup>Cristo xema wisaonita hoka wikinatere wisaonita, exahe exawaiyera wiso hiyeta wiolahareta. Enore Nisekohare atyo kahinaetita wiso hoka hatyo hiyeta wairakoaneharetya kakoita, wawayetyakakoita harenae. <sup>2</sup>Hiyeta hoka maika hatyo xema xisaona hoka nihalahare xamoka. Maika xawaiyetyakakoa, hakakoa xiyahekola xamoka, haxahekoluta xahekotya. <sup>3</sup>Awa atyo xiyahekoluta xisomakoatehena, xahekore maotikonexe kakoa kaihalaharetyaka xikakoa maheta. Maika ximaxaokowiharetyoanehare xisaona hoka xiyahehare xihinaeharenae xaoka. <sup>4</sup>Maika hatya xakini haiyanai aokitere akereta tyaconaha, hoka awatyo haxahekolah xema taita tyaconaha.

<sup>5</sup>Maika Jesus Cristo nawenane akereta xisaona. <sup>6</sup>Xiayiya, Cristo atyo Enore akereta terota xakore hoka maisa Enore akerehare tyacona aokowita. <sup>7</sup>Hoka haxaokala ximita halakisa tyotya hawenane waiyexe hoka wakahare tyacona. Hoka haliti akereta tyacona, hoka haliti akereta kaotyaka. <sup>8</sup>Hoka wakahare akere mokoawi hoka semaxematyare tyacona hakamane kijiya, wainihenere atyalihose xaimaholatyaka hiye kijiya. <sup>9</sup>Hatylo hiyeta Enore aeroretene hoka kalorexe tyacona. Maisa xala harenae nikarehare ehakakoanehare aka. <sup>10</sup>Aeroretene hoka tyotya enokoa, waikoheko tyaconiterenae, ako katyahe tyaconitereharenae harenaita exoaha hakaolise kakoa, semehenaha Jesus nexare hoka, <sup>11</sup>“Jesus Cristo atyo Xekohaseti”, nexahaite kahare halitinai haotita Enexe kakoa kaihalaharetyaka maheta.

### Tyakekohatiyenae Atyo Xaokanatyakalati

<sup>12</sup>Xasemehena, noxiyakawaliharenae, nohinaeharenae, nali notyaonitere xowaka xityakekota niraini. Kalikini atyo maisa nali aka natyo hoka maika exahexe xityakeko niraini. Maika heko xahahena ximairane, xiayiminira xoaha kakoa hoka ximemere xisaona xisekhore niyakehetna naheta maniya. <sup>13</sup>Hiyaiya, Enore atyo hata minita xikakoa, xisaona maheta aokitere akereta, hoka xiyahekola, xihatene xoaha hoka aokitere akereta tyacona maheta.

<sup>14</sup>Tyotya xoalini hare xisomehena hoka ximawerahareneta exahe ximaxiholakakoanehareta xisoma. <sup>15</sup>Nikareya hoka iniyalahare maomaneharenai, exahe firahaliyerenaiya xisaona, Enore ityaninae waiyexenai terotaiya xisaona, iniyalahare, ewaxirahare nomaseharenae konita. Maika xiyaikhena Iraiti Waiyexe tahi ihiyeha hoka xorese werokitere enokoa akeretaira xisaona enekonyaha. <sup>16</sup>Nikareya xisaona hoka Cristo

tyohetehenere ferakiniya kalore nihalahare xamoka. Nikare ite xisaona hoka noxaiyateretyoani exahe nohateni xikakoa atyo maisa mitita xini.

<sup>17</sup>Xoana xamaniya hoka notimalaxi kaxiratyaka. Nikareya nokaxaisaki hoka motyaiya Enore ana nokafetatyakita ene xityakekone hiyeta.

Nikareya nokaxomokaki hoka ehekoreya, exahe nihalahareya xikakoa.

<sup>18</sup>Maika xiso tehitia xihalaharehena, ximaxalohena nokakoi.

### Timóteo, Epafroditó Xoaha

<sup>19</sup>Xekohaseti Jesus kahinaetya natyo hoka naxikaheta rotaiya Timóteo hoka haikoaheta hoka xakailhena xitahi hoka nihalahare naokowita xikakoa.

<sup>20</sup>Maisa atyo xala hare ali nohaliye Timóteo akereta ahekotyare xitahi, exahe kaxaiko aokowiye xiso. <sup>21</sup>Tyotya haiyaharenae atyo mawaiyeharahitaha haxiyehareha kakoa taita hoka maisa atyo Cristo anere kakoa

mawaiyeharexeha. <sup>22</sup>Timóteo atyo waiye, exahe waiyekahalakita xomana enawenane. Natyo, hatyo xoaha hanexe kakoarenae hakitere akereta wahakita hoka Iraiti Waiyexe wiyakaita. <sup>23</sup>Hiyeta hoka nawenani ite waiyekahalakehena hoka naxikatyá Timóteo xomana. <sup>24</sup>Notyakekota atyo Xekohaseti hoka xoana xamanite hoka haxeroreta ite natyota xamani xinali notyoa.

<sup>25</sup>Xoana xamani ite hoka wihinaehare Epafroditó naxikatyá xomana. Hatyo atyo nokahinaetyasehare, exahe haxawalita atyo waiyateretyoa wahakita.

Xiso terota atyo xaxikatene kahinaetya maheta natyo. <sup>26</sup>Kasani waiyeheta aokowita xiso. Kalore mawaiyehareta xasemehenere ehokakene tahi hiyeta.

<sup>27</sup>Aliterexe hokaka, komita waini. Xakore hoka Enore atyo airakoaneharetene. Maisa hatyo taita xini airakoaneharetya. Natyo tehitia airakoaneharetya, maisa exahehare namaikohare aokare hoka. <sup>28</sup>Hatyo hiyeta kasani Epafroditó naxikaheta xomana hoka xiayiやはetene hoka xihalaharehetehitiya maheta. Nikare ite hoka noxamaikohalini tyoteheta. <sup>29</sup>Maika kaokehetehena

Epafroditó xomana hoka xihalahare ekakoa, Xekohaseti koamaniya tyaonitere hiyeta. Exakerehare halitinai xaiminihena. <sup>30</sup>Komita waini Cristo hatene hiyeta, maisa atyo mawaiyeharexe hawenane kakoa. Nikare tyaona kahinaetya natyo maheta, exowaka maisa aliyakere xakahinaetita natyo hoka.

### Waiyexe Wenati Tahi

**3** <sup>1</sup>Exe taitehena, nohinaeharenae. Maika Xekohaseti kalore aihalahalinikisa xiso. Maisa atyo nomaxaharexe noxairali koxaka naxairahenerehareta. Hiyaiya, hatyohare atyo kahinaetita xiso. <sup>2</sup>Xiriharíra iniyalahare tyomiterenai kakoa, hatyo kajolonai aiyateretyoahitere halitinae háre hiyexe haxaikolaha kakoa. <sup>3</sup>Wiso taita atyo wirikotya iniyalahare wománe, maisa atyo hatyoaha xini. Hiyaiya, wihalahareta Enore kakoa Inisekohare hiyeta. Haxawalita wawenane Jesus Cristo kakoa tyaonita hoka hatyo hiyeta wihalahareta. Maisa atyo wityakekore haliti nomanere milihe kaxaikotyakitere hoka iniyalahare wawenane wirikohenere atyo wityakekota.

<sup>4</sup>Notyakekoiya hatyoharenae naokowi hoka notyakekoiya. Xala xamaniya haliti nomanere milihi xaikotyaka tyakeko hoka natyoiya notyakeko naokowi hoka notyakekoiya. <sup>5</sup>Nokaxaiko nomanere milihisaki 8-kihena notyaonita notyaohenereta hoka. Natyo atyo Israel hotyali konita nawenanehare, Benjamim hotyali konitare terota atyo natyo. Hebreu hotyali atyo natyo. Judeunae xaotyakiraho xema notyaonitere xowaka fariseunae hotyali konitare terota ene natyo, <sup>6</sup>hoka noxalijinhareta Cristo koamaniya tyaoniterenae xahita. Hatyo xowakiya judeunae xaotyakisakaho notyaonita hoka xoalini hare kaomaka aokitere akereta notyomita, maisa xoare nomaomaniye.

<sup>7</sup>Hatyo xowakiya tyotya hatyoharenae notyakekota, kalore waiyete nomani. Hoka kalikini atyo Cristo xema notyaona hoka maisa atyo xoare hare tyomare nomani hatyoharenai. <sup>8</sup>Maiha hatyoharenae taita xini. Nomani atyo xiyealiti, exahe tyotya xoalini harenae maisa xoare tyomare. Noxekohase Jesus Cristo xema nawenatyaka atyo waiye kaisere, hatyo taita atyo xoalini hare tyomita. Hatyo hiyeta tyotya nahalakisa xoalini hare. Nomani atyo tyotya hatyoharenae exawatyakahare tyaona. Kasani Jesus xema masakare notyaona naokowita hoka. <sup>9</sup>Cristo xema terota notyaona naokowita. Maisaiya xoare maheta judeunae xaotyakisakaho xema notyaonihitita haliti waiyexe notyaona maheta. Kalikini atyo notyakekota Cristo hoka hatyo notyakekoni hiyeta atyo Enore haliti waiyexe aokita natyo. <sup>10</sup>Tyotya Cristo tahi waiyekehalaka nomani naokita, exahe ekaseneheta niyatere harenai. Kasani tehitiya makawatihenere akereta nomakawati naokowita, exahe wainihenere akereta nowaini naokowita, <sup>11</sup>exahe hatyaoseta nokaxekasekisakeheta naokita hoka nawenani matyotenehare tyaona maheta.

### Temati Imiyane Niyahare

<sup>12</sup>Maisa atyo koxaka nojiyahao akatya, exahe koxaka waiyexe notyaoheta nomita xini, xakore hoka hekota atyo natemita nahikoa maheta kaxekakehenere nomani ana. Hiyaiya, Cristo atyo koxaka aoka natyo haomana. <sup>13</sup>Xiyaiya, nohinaeharenae, maisa koxaka xini nahikoa wenati waiyexe ana, xakore hoka exakere ite notyaona: Nomaotyani ite xoalini hare najikini maniya tyaoniterenae hoka noxani ite nahiti maniya tyaoniterenae ana. <sup>14</sup>Natemita atyo imiyanaose xeta, nahikoa maheta kaxekakehenere nomani ana. Hatyo atyo Enore kawira natyo, Jesus Cristo hiyeta, wenati matyotenehare isa nomani maheta.

<sup>15</sup>Maika wiso wityotya waiyexe wawanane kakoa inityohaliti akereta wisaoniterenai, nahekoitere akereta wityotya wahekotya. Hoka haiyaharenaeya atyo hahekorexe ahekoita hoka Enore atyo ite awaiyekehalakatene xomana. <sup>16</sup>Nikahena hoka waheta maniya wiyan, kalikini wisaonitera akereta. <sup>17</sup>Nohinaeharenae, notyaonitere akeretaira xisaonehena. Xiyaiya tehitiyaira haiyaharenae nawenane waotyakihenere xiso akereta tyaoniterenai.

<sup>18</sup>Kahare haiyaharenae Cristo atyalihose xaimaholatyaka hiye wainihenere kakoa kahalakoaharahitaha. Koxaka éxeharenae nirae xihiye, xakore hoka kalikini niraihitiya nosexi kakoa. <sup>19</sup>Irikati mawakenehare koni ite xaneha hoka kamawenekoaretyakaha. Enenorexaha atyo iniyalahare awaiyetiterehare. Aokowiharetyoahita atyo etakehare kahaiharetyakere niyahare kakoa, exahe ali waikohekao anere tahi taita atyo ahekotyahitaha.

<sup>20</sup>Xakore hoka wisonae atyo enokoa xetarenae. Watyahita atyo wisekohare Niyasehare, Xekohaseti Jesus Cristo, tyoaneneheta nalita xahita. <sup>21</sup>Hawarehare ite moheta wihamé maiyateretaterehare, wainitaterehare, hoka hahamé akereta ite makamanehare mokahene. Hiyaiya, haiyatere kakoa ite tyotya xoalini hare hakatyahakohare moka.

### Xaotyakisati

**4** <sup>1</sup>Nohinaehare, noxiyakawalinae, kalore nakakawatita xiso. <sup>2</sup>Xaihalahalinikijita natyo, naokowiharetyoita xikakoa. Maika heko xikinatere xisaona xawenane Xekohaseti koamaniya kakoa, noxiyakawalinae.

<sup>2</sup>Xasemehena, nohinaehalonae Evódia, Síntique xoaha: maika Xekohaseti wakanehalonae makere xisaonitere hiyeta waiye xamokakakoa. <sup>3</sup>Hasemehena, hiso nohinae waiyexe: maika hakahinaetya hatyo hinamahalo ohironai. Hatyonae, hahotalita Clemente, tyotya haiyaharenae nohinaeharenae xoaha kakoa kalore hakaha, exaoretyaha maheta Iraití Waiyexe tahi. Enexareha atyo xairatyoare tyaonita Enore baberanexa waiyexe nanekoa, hoka makamaneharenae tyaonaha maheta.

<sup>4</sup>Xihalahareta menehenaira xawenane kakoa, Xekohaseti koamaniya xisaonitere hiyeta. Niraehitiya: Xihalahareta menehenaira! <sup>5</sup>Maika xawaiyexehare xisaona tyotya haiyaharenae kakoa. Xekohaseti ite tyoheta rotita. <sup>6</sup>Awa atyo xoalini hare kakoa ximawaiyehare. Xiraexahena hoka Enore xaxa, xoare xamani xaokita hoka xihalaharene kakoa xiraexatya. <sup>7</sup>Nikareya xisaona hoka Enore mehexaikoharene tyaona xikakoa, Jesus Cristo koamaniya xisaonitere hiyeta, hoka ximahiyase, xiyahekola waiye tyaona. Hatyohare maisa waiyekehalakere halitinae ana.

### Wenati Waiyexe

(Efés. 4.1-3; 4.25-5.2; Coloss. 3.12-17; 1 Tessal. 5.14-18)

<sup>8</sup>Hiyeta hoka maika waiye maniya xahekohena, nohinaeharenae. Xoalini hare aliterexe, waiyexe, ehekorexe, kaxaimisakitere, maiyalaharehare, xawaiyetyati, mamaoseralahareti harenae taita xahekohena. <sup>9</sup>Koxaka niraini, noxaotyakiri harenae xasema, exahe nawenani hoka xiayaiya. Maika nikareta xisaona hoka Enore mehexaikohaliti ijitere tyaona xihaliya.

### **Paulo Nihalaharene**

<sup>10</sup>Kalore nihalahareta Xekohaseti koamaniya notyaonitere hiyeta. Wahakiya najikinita xakahinaehtiya natyo. Maisaiya, “Kaxiyani, maisa kahinaetyareha natyo”, nomita. Seko atyo xisaonita hoka maisa aliyakere xakahinaetita natyo.

<sup>11</sup>Exakere atyo niraeta maisa nowawiharenai nokehexoawitere hiyeta xini.

Hiyaiya, nawaiyore atyo nihalahareta koxaka xoalinhare tyaoniterehare nomani kakoa. <sup>12</sup>Waiyekehala kita atyo nomani xoalini hare naokiterehare akiti kakoa, exahe waiyekehala kita tehitiya atyo nomani kahare naokiterehare akiti kakoa. Koxaka exe metaharexe waiyekehala kita nomani: exahe hakititere, xoana xamani notyaonita hoka nihalahareta. Exahenofakatehareta, xoana nonakita xamani hoka nihalahareta. <sup>13</sup>Tyotya xoalini hareya, exahe howitihare mokita nawenani hoka nojiyahotenya, Cristo iyateliti ijitere nomani kakoa.

<sup>14</sup>Howitihare nawenani tyaonitita hoka xakahinaetita natyo, hoka waiyexe atyo xisoma. <sup>15</sup>Exe akiti waiyekehala kita xiso Filipos nali tyaoitionerae ana: Macedônia nahalakihenere, hetati Iraiti Waiyexe noxakaihenere xowaka, xiwawita xakahinaetya natyo. Haiya xowaka waiye notyaonita, haiya xowaka maisa waiye notyaonare harenae hoka xakahinaetita natyo.

<sup>16</sup>Tessalônica nali nokakahinaetyaki naokita hoka xaxikatyta nomani. Maisa hakirore taita xini, komita kahareki xaxikatyta nomani.

<sup>17</sup>Maisa xisa taita maheta xini nomani naokita. Xakore hoka kasani kahare xiyekane katyahe kaotyaka xomana naowita. <sup>18</sup>Tyotya xoalini hare xaxikaitere kaoka nomani, naokitere xahexe kaoka nomani. Epafroditu atyo kolatya nomani xaxikahenerae hoka kalikini atyo maisa xoare naokare. Hatyoharenae atyo motya xijita ene Enore ana. Hatyohare awaiyetita, waiyeta enomana kirakahare kaxaisakitere enomana akereta. <sup>19</sup>Nenorexi atyo ite isehena xomana tyotya xoalini hare xaokiterenae. Kahare atyo kaxiyeharexe tyaonitita, hatyoharenai atyo Jesus Cristo hiyeta tyaonitita.

<sup>20</sup>Maika Wexe Enore kakoa kaihalaharetyaketa mene, eko xoaha.

### **Tyawaxati Miyane**

<sup>21</sup>Maika xiyakaiheta natyo Enore kaxaikoneharenae Jesus Cristo anerenae hiye. Wihinaeharenae ali tyaoitionerae haxakaisakehenahitaha aokaha xihye. <sup>22</sup>Tyotya aliyerenae Enore koamaniya tyaoitionerae haxakaisakehetaha aokaha xihye. Kalorexe César wakaneharenae, sorarenae hare masakare haxakaisakehenahitaha aokaha xihye. <sup>23</sup>Maika Xekohaseti Jesus Cristo nawaiyexehare tyaoна xikakoa. Eko xoaha.